

Saturday, December 27, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



CHOLERA

Lawngtlai leh Siaha district a tuihri leng mek dinhmun chuan zia-awm lam a pan zel a, Myanmar ramri khar chhunzawm a la ni.

Siaha district Additional DC Pu Abraham Beirazi Khithie chuan ramri kharin zawm that a hlawh a, Tipa community health centre (CHC) a tuihri natna vei enkawl mek 6 bak chu kai thar an awm thu district health officer-te hnen atanga a dawn loh thu a sawi. Siaha district-ah hian November thla khan tuihri avangin mi 3 an thi a. Tun hnai atangin Lomasu, Lodaw, Lopu leh Khaikhy khua-ah te a leng leh a, nunna chan erawh chu an la awm lo. Addl. DC chuan tuihri natna kaite hi Myanmar lama bungraw phurlut thin lirthei khalhtute leh sumdawng vek an nih thu a sawi a. Ramri an kan tawh loh chuan tuihri leng dinhmun hi a zia-awm chho zel tura a beisei thu a sawi a ni.

Lawngtlai district-ah pawh tuihri kai thar report a awm lova, Lairam Isua Krista Baptist Kohhran (LIKBK) enkawl LCMC damdawi-in a tuihri vei ni a rinhlelh enkawl mek 8 an awm mek a. Puan tawh angin tun kar chho khan tuihri vei ni a hriat mi 4 an thi a, November a mi 6 thi nen Lawngtlai district-ah mi 10 an thi tawh a ni. Tuna tuihri avanga nunna chan mi 4 leh kai tharte sample hi Zoram Medical College & Hospital-ah thawn a ni tawh a, Laboratory-a endikna hmuh dan nghah mek a ni. LCMC damdawi-ina doctor sawi danin tuihri natna kaite hi Myanmar lam nena inhne hnai, ramri vela sumdawng leh chetla vek an ni a. Tualchhungah a la darh rih lo ni-a ngaih a ni.

Siaha leh Lawngtlai district thuneitute'n tuihri leng avanga Myanmar ramri an khar chu khar chhunzawm zel a la ni a. Myanmar lam atanga sumdawnga lo lut an awm hranpa loh avangin Mizoram atanga bungraw hralh tura kal dan vek an ni a. Chin state chhim lam Paletwa leh a chheh vel khua-ah tuihri hi a len avangin insumdawn tawna a Mizoram lam atanga inhnawihthe'n an kai tih hria-in ramri hi khar a ni a. Lawngtlai district bawrhsap chuan thla 2 chhung ramri hi kharin Siaha district thuneitute chuan kum thar January ni 4 thleng hi an khar phawt a ni



CHRISTMAS FEASTS

Nimin Aizawl veng thenkhatah Mizoram pawn atanga lokal Krismas ruai theh ve an tam hle.

Ruai theh zingah hian ram chhung hmun hrang hrang atanga lokalte bakah ramdangmi (foreigner) pawh an tel a. Chanmari, Zarkawt, Dawrpui, Mission Veng, Khatla leh Kulikawn atanga thu dawn danin Mizoram pawn atanga lokal hnam dang thahnem tak chu biak-in inkhawmna bakah lenkhawmna-ah te telin ruai an theh hlawm a, nuam an tih thu an sawi nasa hle tih thu dawn a ni. Ram pawn atanga lokal mingo leh khawchhak lam hmelpute pawh an awm nual. Chanmari Presbyterian kohhran biakin-ah chuan inkhawm, lenkhawm leh ruaitheh a hnamdang tel ve an tam avangin kohhranin biak-in kawtah Bible tract an dah a. Hindi, Bengali leh English a ziahte chu an lo sem a ni. Kulikawn a awm Catholic kohhran Christ the King Cathedral-ah pawh state pawn ami engemawzatin ruai an theh ve a ni.

Aizawl a awm hlun mi thenkhat chuan kumin hi Mizoram pawn lammi Krismas lawmna inkhawm, lenkhawm leh ruaitheh a an tel tam ber kum a la nih thu an sawi a. Kum lokal leh zel turah pawh an la pun zel an beisei thu sawi-in chutiang lo dawl zo tura inbuatsaih chhoh pawh a la ngai dawn a ni an ti.



RUBBER

Lunglei District chhunga rubber ching tu te chuan zau zawka hmalak an tum a, kumtharah hian ram hectare 500 a zauvah rubber chin tumin hma an la mek.

Lunglei Rubber Grower Association chairman Pu Lalengliana Renthlei-in kan Corr a hrilh danin thelret ching engemawzat an awm a, mahse enkawl puitling leh ti tak tak erawh an tam lutuk lo tih sawiin tunah hian thelret kung, hnai theih hi Lunglei Dist-a hmun hrang hrangah kung sing 6 vel a awm ang niin a sawi. Rubber chinna hmun hi Lungsen, Phairuang, Zawlpui bakah Mauseh leh Ramlaitui velah te a ni ber a ti. Rubber Board kaltlangin Polypot a dah thelret tiak chu a ching duh te hnenah a thlawn a sem theih reng a ni tih sawiin Rubber Board hian bultan duh tan a ram zau dan azirin tanpuina Rs 25,000 te pawh pawisa an pe a, mahse a ching duh te hian online in lehkha pawimawh aadhar card, ram LSC te nen an dil ve erawh a ngai niin a sawi. Loneitu pakhat zelah Polypot a siamsa tiak 480 kum khat atan an pe thei tih a sawi. CM Rubber Board hnuaiah pheih chuan a thlawn vek in Sorkar in hma a lak pui a, a nung tha a nih chuan kum 4 vel atangin a hnai theih a ni a ti. Tunlai hian a hnai hi Kg-ah Rs 150 in an hralh tih a sawi a, a hralhna a that chang chuan Kg-ah Rs 180 te pawh a kai thin niin a sawi.

Hnai erawh tlemin a hautak a, a hnai chu plate-ah acid nen an chiah thin a, tlai lamah a lo khal a, chu chu khawlah an her a, nisa ah ni 2 ni 3 an pho leh a, meihin emaw nisa ah emaw ni 4 atanga ni 5 an pho leh thin a, a hralh theih tawh a ni a ti. Company lam hian Pick-up in a phurh zawh tawh a nih chuan an rawn lei vang vang thei tih a sawi bawh.

